

VII

Lo cîntyiemme djoué, aidé grâche â moton, ci chcrèt de lai vie di ptét prînce me feut dgétçhi (*révélé*). È m' demaindé aivô bruchqu'rie , sains préfaice (*preamble*), cment l' frut d' in probyème bîn grant djâbiè (*médité*) en coidge (*silence*) :

- In moton, s' è maindge des aibrâs, è maindge âchi les çhoués ?
- In moton maindge tot c' qu' è trove.
- Meinme les çhoués qu' aint des épainnes ?
- Âye. Meinme les çhoués qu' aint des épainnes.
- Aidonc les épainnes, en quoi ât-ce qu' elles sèrvéchant ?

Î n' lo saivôs pe. Î étôs dâli tot piein otiupè è épreuvaie de dévissie in bôlon trop serré d' mon moteur. Î étôs trop chaingnou (*soucieux*) poéchque mon en-rotte (*panne*) ècménçait de m' aipairâtre cment brâment graîve, èt peus l' âve è boire que s' épujait me fsaît crainjie l' pé.

- Les épainnes, en quoi çoli sie ?

Lo ptét prînce ne rnonçait djmais en ènne quèchtion, in cô qu' è l' aivait pôjè. Î étôs aidiaichie poi mon bôlon èt i yi réponjé n'împoétche quoi :

- Les épainnes çoli n' sie è ran, ç' ât d' lai çhaîre croûytè (*pure méchanceté*) d' lai paît des çhoués !
- Ôh !

Mains aiprés ènne coidge è m' tchaimpé, aivô ènne soûtche de rantuine :

- Î te n' crais pe ! Les çhoués sont çhailes. Elles sont beurlandoujes (*naïves*). Elles se raichurant cment qu' elles poéyant. Elles se craiyant tèrribyes aivô yôs épainnes...

Î n' réponjé ran. En ci môment-li i m' diôs : « Che ci bôlon tînt encoé bon, i lo fré sâtaie d' in côp d' maîtché. » Lo ptét prînce déraîndgé d' nové mes musattes (*réflexions*) :

- Èt te crais, toi, que les çhoués...
- Mains nian ! Mains nian ! Î n' crais ran ! Î âi réponju n'împoétche quoi. Î m' otiupe, moi, de tchôses sérioujes !

È m' raivoété churpris.

- De tchôses sérioujes !

È m' voyait, mon maîtché en lai main, èt les doigts nois de caimbois, pentchie tchu ènne tchôse que yi sannait brâment peute.

- Te djâses cment les grantes dgens !

Çoli m' é fait in pô voîrgangne (*honte*). Mains, împietéâbye (*impitoiyable*), èl aidjouté :

- Te mâches (*confonds*) tot... t'emmâches (mélanges) tot !

Èl était vrâment brâment aidiaichie. È hcouait en l'ôûr (*au vent*) des pois (*cheveux*) tot doérés :

- Î coégnâs ènne piaînnatte laivou è y' é in Chire craimejîn (*cramoisi*). È n' é djmais çhioûchè (*respiré*)

ènne çhoué. È n' é djmais raivoétie in yeûtchîn. È n' é djmais ainmè niun. È n' é djmais ran fait d' âtre que des aiddichions. Èt tot lai djoînnè è rêcmence cment toi : « Î seus in hanne sériou ! Î seus in hanne sériou ! » èt çoli l' fait gonçaie d' ordieu. Mains c' n' ât p' in hanne, ç' ât in moûchiron (*champignon*) !

- In quoi ?
- In moûchiron !

Lo ptét prînce était mitnaint tot biève de colére.

- È y' é des miyons d'années que les çhoués faibritçhant des épainnes. È y' é des miyons d' années que les motons maindgeant tot d' meinme les çhoués. Èt ç' n' ât pe sériou de tieuri è compâre poquoi qu' elles se bèyant taint d' mâ po s' faibritçhaie des épainnes que n' sèrvéchant djmais è ran ? Ç' n' ât pe

ïmpoétchaint lai dyierre des motons èt des çhoués ? Ç' n' ât dran pus sériou èt pus ïmpoétchaint que les aiddichions d' ïn grôs Chire roudge ? Èt ch' i coégnâs, moi, ènne seigne çhoué â monde, que n' éjichte en piepe ïn yûe, sâf dains mai piaînnatte, èt qu' ïn ptét moton peut ainiainti (*anéantir*) d' ïn seingne cô, cment çoli, ïn maitîn, sains s' traichie (*rendre compte*) de c' qu' è faît, ç' n' ât pe ïmpoétchaint çoli !

Èl ât vni roudge, èt peus èl é rpris :

- Che quéqu'un ainme ènne çhoué que n' éjichte ran qu' en ïn éjempiaire dains les miyons èt les miyons de yeûtchîns, çoli cheûffît po qu' è feuche hèyerou tiaind qu' è les raivoéte. È s' dié : « Mai çhoué ât li quéque paît... » Mains ch' lo moton maindge lai çhoué, ç' ât po lu tot cment che, bruchqu'ment, tos les yeûtchîns s' éteingnînt ! È ç' n' ât p' ïmpoétchaint çoli !

È n' é ran poéyu dire de pus. Èl écâçhé (*éclata*) bruchqu'ment en chnoufes (*sanglots*). Lai neût était tchoé. Î aivôs laîtiche mes utis. Î m' fotôs bîn d' mon maîché, d' mon bôlon, d' lai soi èt d' lai moûe. È y' aivait, tchu ïn yeûtchîn, ènne piaînnatte, lai mîn, lai Tière, ïn ptét prînce è concholaie ! Î l' prenié dains mes brais. Î l' brécé (*berçai*). Î yi dié : « Lai çhoué que t' ainmes n' ât pe en dondgie... Î yi graiyoneraî ènne meûthiere (*muselière*), en ton moton... Î te graiyoneraî ènne airmure po tai çhoué... Î... » Î n' saivôs pe trop quoi dire. Î m' sentôs gâtche (*maladroit*). Î n' saivôs pe cment l' diaingnie (*atteindre*), laivou l' eurdjoindre... Ç' ât taint michtérieû, l' paiyis des laîgres.